

青
城
山
記

青城山記目錄

第一卷

原始記

四至記

諸山記

官觀記

古蹟記

第二卷

事實記上

隱逸

事實記下

方技

青城山拾遺

青城山逸事

序

予家鄙江之北距青城三數十里洞天福地之勝童子時已厭聞之壯日草草一遊遂已厥後南北奔馳思一再往而不可得丁亥夏讀禮家居謝絕人事吾姻蔣君錫藩門人斬生維藩相與訂青城之遊越五日肩輿登山及暮皆會道院俄而驟雨閉門不可以步意甚索然翌日晚鐘方罷旭日射牖爛然紅紫急起命僕扶翼登山歷重岡陟列巘窮高極深直達上清絕頂千巖萬壑獻秀供奇岷江百派亦盈盈在衣帶間二子與道人從予後指點諸山勝蹟厯厯可數氣爽神怡如在蓬闌幾不知人世間有此異境也日旣西傾歸休對酌二子曰今日之游樂乎

予曰然惜不得古人所爲甲記乙記者一一從而証之良爲憾事二子曰文獻不足獻逆之罪也守缺抱殘儒生之咎也彼羅浮匡廬崆峒五臺皆各有志又往往出自鄉人青城爲神仙都會雅與諸山匹敵聽其就淹甯非吾黨之過耶予曰多見而識賢者事也得十一而遺千百不重貽山靈羞乎二子曰否否天地之化往者過來者續前賢之廢墜賴今日補之今日之缺遺後世胡能聽之又安見大雅之不復作耶予聞而善焉歸止敝廬檢閱羣籍就所見錄爲一冊名曰青城山記聊存梗概云耳若云揚洞天之勝搜福地之奇烏乎敢

光緒丁亥蒲月望後二日鄙江漁子彭洵叙於種書堂

續刊青城山記卷上

鄆江彭洵編輯

及門諸子校刊

原始記

青城山者灌之南山也地濱大河以西帶江背郭綿延不下百里元和志謂在青城縣西北三十里寰宇記謂在青城縣西北三十二里是也自三皇時甯封棲真黃帝問道青城之名遂著迨漢天師張道陵斬草除溷講授丹經白日冲舉青城於是益顯雖羽衣清脩棲遲岩穴後先不可殫述而青城之名播諸冊籍艷稱無窮道書云青城爲神仙都會福地記云上有沒溺池

甘露芝草玉匱經云此第五大洞寶仙九室之天黃帝所拜奉爲五岳丈人黃帝刻石拜謁纂書猶存天師立青城治於中五岳真形圖云青城洞天所在其下別有日月分精所照御覽云黃帝遍歷五岳封青城山爲五岳丈人第五大洞寶仙九室之天連峯掩映互相連接靈仙所宅靈異甚多名山洞天福地記云第五洞天周迴二千里名寶仙九室之天唐六典劍南道名山之一曰青城枕中記云鬼谷先生爲太元師治青城山方輿勝覽謂青城一名赤城又名青城都陸放翁亦云青城一名赤城杜光庭云岷山連峯接岫千里不絕青城爲第一峯山有七十二小洞應七十二候八大洞應八節輿地記勝云青城八大

洞一太乙二九仙寶室三娑羅四高臺玉寶五麻姑六寶園七

聖母八都督漁洋山人云青城有山市當天清氣朗一望皆城

郭都市瓦屋螺青車馬人影往來絡繹甫詫異間移時隱滅此

固青城之大較也古人之記載眾矣若邱壑之奇壇廟之盛高

人逸士之廣方外技術之繁又豈區區者所能盡哉唐錢起有

青城山送楊杜二郎中赴蜀軍歌云

蜀山西南千萬重仙經最說青城峯青城峽岑倚空

碧遠壓峩眉吞劍壁錦屏雲起易成霞玉洞花明不知夕星臺

二妙逐王師玩瑀軍書王粲詩曰落猿聲連玉壘晴來山翠傍

旌旗綠蘿春月營門近知君對酒遙相思宋趙忭有謁青城山

詩云背琴負酒上青城雲爲閒收月爲明觀宿有詩招主簿盧

同無分見先生牆留古畫仙姿合石載奇文俗眼驚都念吾鄉

山亦好十年孤負爛柯行范成大再題青城山詩云萬里清遊

不厭瀟雙旗換得一枝筇來從井絡直西路上到江源第一峯

海內閒身輸我逸山中佳氣爲人濃題詩試刻巖前石付與他

年蘇暉重國朝王士正望青城山詩云雲氣連西域名山仰漢標千秋軒帝跡每夜岳靈朝玉宇峻丹壘神燈下碧霄丈人作五字五字何足多青城覺靈異我來遊青城白雲暫留憇未暇更題詩復恐礙雲意偶然咳唾落九天不會默著青城地蔡時田將赴青城從離堆渡入筏村道中即景云過江指青城江村一灣緣踏沙去洲渚岸行入林麓樹密靜行人林深鳥側目一坪淺草地十丈古喬木四圍佐濃陰數點漏初旭便可席其間樹裏微風出一坐訂終日蟬聲聞斷續未到六六峯先此忘塵躅又青城雜詩云關風伏雨過青城洞裏琳官少送迎隔斷乾坤支柱影岩搖日月入鍾聲六時巖畔聽殘偈三素雲中謁上清五月騎驢遊太華不如來謁范長生蔣制軍礪堂遊青城山詩云話到青城意欲顛悠悠天地浩無邊神仙弱水三千里世界空花四十年前古有懷皆渺矣後今相識總茫然任他大夢終朝醉風月從來不愛錢邑宰王夢庚遊青城詩云傑閣崔巍倚上清清宵餘味步虛聲峯圍仙磬深難散月避神燈遠愈明坐久風前添鶴氅更殘天上聽雞鳴何當絕頂凌霄漢來試猴山子晉笙杳禮遙見青城欲遊不果詩云青城近接岷山南城層巘疊嶂浮蒼嵐舊稱福地列第五芝草塢花春長探前爲赤面丈人名屢變樹叢石古老怪生晦夜煌煌聖燈

現上臨天倉三十六峯青峯峯插雲多奇形別開竅竅八大洞
符合八節潛通靈小洞周圍七十二數應候氣見神異羣仙翔
搖青痕修途未暇陟崇嶺短歎長噭鑒山影待約他時雨霽初
提壺獨往尋幽境吳勤惠公棠西巡望青城山詩云蘿衣蘚磴
簇雲屏州六高峯石氣清懸澍卽爲天下雨不須丹竈叩仙靈

四至記

洞天福地記云青城周迴二千餘里是山勢綿延不可紀極第
就域內所常遊者舉之西至大面山山後老人村諸
山概歸縣記南至太安
山東至香積寺山北則山麓數十里胥屬平疇

諸山記

青城之山最高而最上者爲大面山一名趙公山因
趙昱隱此而名潛確類書
云大面山爲七十二福地之一羅真人所居輿地紀勝云在三

溪之北高七十二里蓋其地山勢陡峻雲霧時隱下視羣峰兒孫羅列每春冬積雪封逕如銀海玉山人踪罕到惟虎豹之跡時出入耳凡遊者皆以盛夏新秋天清氣暖窮數日力方可登陟瞻眺過此則不可往去由大面山北趨而漸低者爲

大坪山幽杳高曠樹茂林深登大面者必經之道東去爲老君巖巖有老君廟山因以名又東爲

三台山又東爲

挖斷山前明萬厯間謂山中有王氣令鑿斷之故名又東少南爲卧牛山古名石梯山又名伏牛山有異花芝草食之可以長生見輿地紀勝再東爲

大牛心山少北爲

小牛心山又名端翠山輿地紀勝云獨立雲中諸峯不接上有石池爲仙人藏劍之所又東爲

登龍山卽古龍門山一名石峯山又名看花山危橋相向若層門然中峯有紅躑躅花陰靄數步遂改名看花山宋馮山人隱於三溪路牛心山前看花山後當卽此少北爲鳳凰山山產麩金居人多因以富然亦易爲地方擾累東北則爲橫山一嶺橫出上下皆平疇過此盡陸地矣由大面山直東爲

八卦台卽古壓月山輿地紀勝云山在青城縣西晉朝置上皇觀於上上有桂木名花靈芝仙草李阿常游是八卦台卽古壓

月山也杜光庭記云青城山八大洞應八卦以通八水其中五大洞上應列星之宮瑞林寶樹金沙玉田水清而甘草靈而子八卦之名殆由此歟輿地紀勝云成都山爲青城案山前臨麻姑洞深不可測舊志云青城道宮丈人上清爲最餘皆在山麓五里至上清宮又至成都山則爲半山至大面則爲巔以此考之八卦臺似卽成都山仙人洞卽麻姑洞然無確指不敢遽定再東爲

王婆崖崖中有涪熙四年趙真修路八字是宋時已多遊者崖有龍洞石定江水入之聲若雷鳴東下卽滴水崖懸溜數十丈清涼可飲按王象之云龍居溪在成都山下眾谷之水皆注其

中懸流九十尺下有龍洞殆卽此水歟存之以俟博雅東下爲龍滾邊俗名羅鍋扁卽龍洞水出口處過此亦盡平陸矣由大面山南趨爲

通靈溝俗名偷營溝以獻逆自此入破太安寺故也再南爲長坪山輿地紀勝云山在味江之上昔杜宇與居人避水其上城壘居第往往尚在有太安寺寺門蓋花坪老澤路也又方輿勝覽云長坪山捫蘿而上烏道三十里爲牡丹

坪殆卽此歟再南爲

沙坪山當卽古花坪又古寶唐山產佳茶明楊慎和章水部茶歌跋云往年在館閣陸子淵謂沙坪茶信絕品何無稱於古余

曰毛文錫茶譜云玉壘關寶唐山有茶樹懸崖而生筍長三寸五寸始得一葉兩葉晉張景陽成都白兔樓詩云芳茶冠六清逸味描九區此非沙坪茶之始乎據此則沙坪之山又卽寶唐山矣詩云玉壘之間寶唐山丹危翠險不可攀上有沙坪寸金地瑞草之魁生其間芳芽春茁金鴉觜紫筍時抽錦豹斑相如凡將名最的譜之重見毛文錫洛下盧洞未得嘗吳中陸羽可曾覓逸味盛誇張景陽白兔樓前錦里旁貯之玉盃薔薇水擬以帝臺甘露漿餅聚能雲分麝月蘇蘭薪桂清芬發參隅迢遞渺天涯玉食何由獻金闕君作茶歌如作史不獨品茶兼品士西南測隱阻明陽官府神仙多蔽美君不聞夜光明月投人按劍嗔又不聞二腫蟠木先容爲上珍由通靈溝東趨爲馬蝗岡岡下爲棋盤石相傳古仙人對奕處北趨爲木魚山又北爲

鉸子山青烏家謂爲青城翊衛由馬蝗岡北折而東爲

第一峯卽古高臺山也高峯秀出襟帶諸山水村山郭一覽無
際山有聖燈每晴霽光焰熊熊飛行各嶺仍還舊處而滅吳船
錄云岷山數百峯悉在檻欄下如翠浪起伏勢皆東傾夜有燈
出四山以千百數謂之聖燈說者多不決或云古人藏丹之光
或云草木之靈亦有光或又謂神龍山鬼所作其深信者則謂
仙聖所設化也由第一峯南趨蒼翠萬狀者爲

三十六峯卽古之天倉山也輿地紀勝云在延慶觀南連崖隱
軫爲三十六倉神仙密藏金石異寶米鹽雜貨於中又云諸峯
屹然有三十六每峯各有一洞杜廣成云前十八曰陽峯後十
八曰陰峯宋呂大防詩云天倉三十六峯擁翠微間晁公遡詩

天公夜半剪冰花三十六峯如玉立卽此南折而東爲涼風頂
又東爲

禪師崖崖爲入山險隘有一夫當關之勢明季太安寺僧了空
鑑隨率眾禦賊觸崖死難鄉人義之繪像崖間以祀今山民婚
喪凡鼓吹過境必祭而後可行蓋英靈所致云再東爲

筆架山峯巒數曲因形賦名再東爲

香積山輿地紀勝云山寺前有瀑布有鷄骨禪師塔山有頂名
孤鶴形勢孤峭矯若鶴立故絡繹而下岡巒競秀葱鬱怡人幽
溪曲逕隔絕塵寰又復別有天地由第一峯而北爲

丈人山范成大謂至上清宮下視丈人峯直牆堵耳卽此唐岑

參有青城丈人峯詩云

五岳之丈人西望青霄霄雲開露崖嶠
絕頂小蘭若四時嵐氣凝身同雲虛無心與谿清澄誦戒龍每

聽賦詩人則稍杉風吹袈裟石壁懸孤燈久欲謝微祿誓將歸

大乘願聞開士

疏庶以心相應丈人之南爲

鬼城山俗名月城山錄異記云王蜀壬子歲七月十三日青城
鬼城山滯雨崖崩暴雨大至在丈人觀後高百餘丈殿當其下
將憂摧壞俄墜石如岸偃水向東竟免漂陷觀中嘗苦汲自此
暴雨出處流泉直注厨內其味甘香冬夏不絕丈人東南爲
元真山輿地紀勝云在丈人觀前上有神草如稻苗食者昇仙
東北爲

飛赴山方輿勝覽謂飛赴寺在青城飛赴山下者是也從此徑

趨平原矣由第一峯而東爲

混元頂三峯特起駢羅鼎峙狀若覆釜葱翠離奇第三頂下爲天師洞洞在峭壁間崇竦千尋直下如削檣櫓飛空下視股栗洞口羣山若拱若揖浮嵐空翠盡在襟袖山外青疇綠野厯厯在曰洞中有天師像開元御勅碑西漚李惺有憶青城天師洞舊遊詩云十二樓高接玉京四無人影四無聲爐邊斜倚柄燈雙清莊此境何由冉夢人松關路亦生洞北綿亘東趨者爲

龍居山俗音青龍閣
一名掛坊閣冉東寫

太平山一名藥王山山趾卽太平場市聚也洞南爲偏橋橋當兩崖中斷下臨深溪一落千丈細逕如線僅支一木蟻附而行

游者輒止今已鑿山通道作天然橋翼以石欄坦夷無碍度橋而南爲

祖師殿爲

軒轅頂卽甯封棲眞黃帝問道之處舊有軒皇臺今廢又南爲擲筆槽槽深數十丈自南而北直達偏橋不下里許按王象之碑目云天師戒鬼筆迹深一十三丈濶三十丈在大龍橋側名勝志云龍橋處兩峯之間相去百餘步峯巒危竦橋在峯半漸促漸小可五六寸長一丈五尺兩岸懸崖俯臨不測山傍有誓石天師與鬼兵爲誓朱筆畫山青崖中斷今斷處石並丹色據此則大龍橋卽今之偏橋朱筆所畫之青崖卽今之擲筆槽

也南折而東爲

白雲溪乃文潞公爲張俞罷宅處又東爲

乾元山錄異記云乾元之南六十餘里地名東柱西柱眾山連接峯巒秀異又云東有數峯峭拔一峯最高云是蒲仙上昇之所是乾元之名又最古矣再東爲

三獅山重岡秀出狀若伏獅橫截南下諸山別具意態青鳥家謂所以鎮水口也蓋青城諸山以大面爲祖高臺爲樞天師洞爲中主羣山環衛空翠四合每春融日麗朝焰溟濛樹色山光狀若城郭圍繞空際故曰青城云

宮觀記

青城爲古今名勝宮觀綦多滄桑屢變興廢迭更不能備舉第就所存與可考者書之在大面山之腹者曰

慶雲寺寺最古相傳爲明初建人踪罕到未經親厯恐猶未確蓋青城宮觀晉唐所建者多也在八卦臺者六一曰上皇觀蜀志補罅謂卽古元真觀建自晉神芝異草嘉樹名花多產於此芝草如稻苗食之可仙唐章孝標詩云

烟霞星蓋七星幡想像哉藥地皇風猶在步虛壇樓臺瑞氣騰蕭索杉檜龍身老屈蟠翻感惠休并李郭劍門空遠望長安國朝黃廉訪雲鵠有詩云散吏何緣謁上皇仙山有處近高蒼雨添崖翠迎眉潤風逗溪聲引興長萬木陰濃宜避暑雙杉年久自生香巍峨枯朽物也曹容領畧烟霞趣

蓋謂元宗幸蜀時曾遊此也其五則曰

青皇觀曰 中皇觀曰 文昌宮曰 真武觀在三台山者一

曰 東嶽廟在龍滾邊者二曰 上元宮曰 青山寺在鳳凰
山者二曰禹王廟曰 畸龍寺在木魚山者三曰 天真觀曰
菴曰 樂靜菴在三台山者二曰 沈家菴在太安山者二曰
太安寺相傳寺始自唐明代復振樓殿之盛甲於青城獻逆
之亂燬於火今猶有嘉靖間古鐘記至正及成化諸年復建事
在沙坪者二曰 郭家菴在頓子崖者二曰 白馬廟在乾元
山者二曰 黑虎觀在龍居山者三曰 石筍堂曰 龍居菴
曰 飛仙觀 國朝許水南儒龍有緣溪赴常道觀飛仙觀詩
連峯忽中開奔峭亦已了斷壁夾溪深危磴出林杪曲折緣
蒼崖迢遞穿叢篠一涯地幅仄十里天繚繞夕景翳藤蘿茫

茫茫失昏曉路窮見仙都朱閣懸縹渺前登但過雲俯瞰出飛鳥
初驚物象幽坐使塵跡少茲遊偶然遂已爲來者肇誰歟知我
心窺據山月皎在孤鵠頂下者一曰 香積寺卽古靈巖寺輿地紀勝

云靈巖寺在香積山寺前有鷄骨禪師塔又云禪師西魏時來
青城山嗜食鷄今有塔在香積寺是香積之名宋已盛傳矣在
丈人山之陰者曰 丈人觀在丈人山之陽鬼城山之東者曰

建福宮按吳船錄云丈人峯下五峯峻峙如屏觀之臺殿上
至岩腹丈人自唐以來號五岳丈人儲福定命真君傳記署云
丈人姓甯名封黃帝問龍蹻飛行之道今賜名會慶建福宮是
丈人觀之爲建福宮實自宋始舊志云青城山有丈人觀丈人
行宮據此則今之建福宮乃古丈人觀今之丈人觀乃丈人行

宮也青城甲記云黃帝封青城山爲五岳丈人乃岳瀆上司真
仙崇秩一月之內羣岳再朝晉代置觀焉續博物志云青城縣
歲春秋以蔬饌饗丈人山令躬行禮蒸蜀之望山也錄異記亦
云司馬承禎奏元宗云名山岳瀆血食之神以主祭祀太上慮
其妄有威福以害蒸黎分命上真監蒞川岳有五嶽貞君有青
城丈人爲五嶽之長彈糾萬神各置廟以齋食爲饗王蜀咸康
元年王衍嘗奉太后太妃同禱青城游丈人觀謁建鑄像全唐
詩有青城丈人詩二章其送太乙真君酒云

峨嵋仙府鶴沈沈
玉液金華莫厭斟

凡客欲知眞一洞劍門西北五雲深曲龍山翫月云月砌瑤階
泉滴乳玉簫催鳳和烟舞青城丈人深處遊元鵠唳天雲一縷
唐杜甫丈人山詩云自爲青城客不離青城地爲愛丈人山丹
松近幽意丈人祠西洞唯佳氣儂綠雪擬住最高峯僊除白髮

黃精在君看他時冰雪容太后徐氏丈人觀謁先帝御容詩云
聖駕歸梧野躬來謁聖顏旋登三徑路似陟九疑山日照堆嵐
迫雲橫積翠問期修封禪禮方俟再躋攀太妃徐氏丈人觀詩
云獲陪翠輦喜殊常同陟仙壇豈厭長不羨乘鸞入烟霧此中
便是白雲鄉宋文同詩云羣峯垂碧花下擁岷仙家神皇被金
巾坐領五帝衡威靈攝真境俗諺不敢譁精心叩珠庭俯首仰
紫華願言鳳羅盟畢世驅塵斜循奉蕊珠戒期之飛太霞陸游
丈人觀詩云黃金篆書榜朱門夾道巨竹屯蒼雲崖嶺割入天
地分千柱耽耽壓其垠濯纓肅謁丈人君廣殿空庭吹寶薰摩
挲畫稿手爲皺異哉山兜與土競物怪鑿鑿如邱墳仙人珮玉
雜帨幃手整貂冠最不羣欲去不忍恨日曛道翁采藥晝夜勤
松根茯苓獲兼斤食之植立彊骨筋拘杞羣吠聲狺狺山爐小
瓶吹幽芬朱顏不飲常自醺我亦宿誦五千文一念之差墮世
紛吾將從翁走如闔隱書祕訣何由聞又有題丈人觀道院壁
云斷香浮月磬聲殘木影如龍布石壇偶駕青鸞塵世窄間吹
玉笛洞天寒奇古滿院晨炊藥異氣穿巖夜沿丹郤笑飛仙未
忘俗金炤猶著侍中冠孫太古畫

在高臺山者爲

上清宮吳船錄云上清宮在最高峯之頂以版閣插石作堂殿

下視丈人直牆堵耳輿地紀勝云高臺山在丈人祠之西晉立
上清宮於上山有列聖殿今廢按新五代史前蜀世家云王衍
嘗與太后太妃遊青城山宮人衣服皆畫雲霞飄然望之若仙
衍自作甘州曲述其仙狀上下山谷衍常自歌使宮人和之又
乾德五年衍起上清宮塑王子晉尊以爲聖祖至道玉宸皇帝
肖建及衍像侍立左右又於正殿塑元元皇帝及唐諸帝備法
駕朝之益州名畫錄云命杜觀龜畫於上清祖殿并授翰林待
詔賜金魚袋又史稱唐莊宗使李嚴聘蜀衍與朝上清宮蜀都
士庶簾帷珠翠夾道不絕青箱雜記亦云衍造上清宮成塑元
元皇帝及唐諸帝像衍躬自薦饗按舊志青城山有列聖殿當

卽諸帝像殿也宋陸游有宿上清宮詩云九萬天衢浩浩風此

身真是一枯蓬盤蔬

採掇多靈藥閣道攀躋上半空累盡神仙端可致心虛造化欲無功金丹定解幽人意散作山椒百炬紅夜中山谷火煜然俗謂聖燈意古藏丹所化也登上清小閣云樓觀參差倚晚晴偶然信腳得閒行欲求靈藥換凡骨先挽天河洗俗情雲作玉峯時特起山如翠浪盡東傾何因從此橫空去笙鶴飄然過洛城又有宿上清宮詩云永夜寥寥憇上清下聽萬壑度松聲星辰頓覺去人近風雨何曾敗月明是夕山下風雨絕頂月明到曉早歲文辭妨至道中年憂患博虛名一菴儻許西峯住常就仙曹問死生又有自上清延慶觀歸過丈人觀少留詩云再到蓬萊路欲平卻吹長笛過青城空山霜葉無形迹半嶺天風有嘯聲細棧攀雲縈峭絕危橋飛挂插澄清玉華更控青鸞住要倚闌杆待月明范成大上清宮詩云厯井柵參丹楡通處更躋攀冥濛蜀道一雲氣破碎峴山千髻鬟但覺星辰垂地下不知風雨滿人間鷗牛雨角渾如夢更說紛紛觸與蠻文同有題壁一絕云天氣陰陰別作寒夕陽林下動歸鞍忽聞人報後山雪更上上清宮上看

在天師洞者爲

常道觀觀爲隋大業間置始名延慶唐改常道宋名昭慶今則

概言天師洞矣唐時爲飛赴寺僧侵居元宗時勅令仍歸道士其御勅碑畧云蜀州青城先有常道觀元在青城山中聞有飛赴寺僧奪以爲寺州既在卿節度檢校勿令相侵觀還道家寺依山外舊所使道佛兩所各有區分今使內品官毛景懷道士王仙卿往蜀川等州故此遺書指不多及右勅宋文同有昭慶觀詩云
琳崖盤玉霄彩翠接步武雲霞不可盡泉石固難譜神幢逾百尋常轍歷萬古靈瀑誰與窮長飛六時雨國朝蔡時田有初入青城寓常道觀詩云入山森耳目蒼深天地失合沓聳青巒蕙蕪蘿山質蒼毓藏神理烟靄滿欲溢藤蘿蔽日月子午多不的萬古養蔚藍天應苔蘚蝕琳宮遙在望茂樹隔澗密仙人御祿髓大是甯封匹老作青城游陔唾成點碧湖廣飽我饑趺坐訂二日天師洞之南爲

三皇殿殿爲古黃帝祠遺址又南爲古偏橋橋南三里爲祖師

殿又南爲白雲溪按輿地紀勝云清都觀在延慶觀上二三里
一名洞天觀宋文彥博鎮蜀日市清都觀側隙地以贈張愈其
下卽白雲溪因號白雲隱居宋史亦稱白雲溪爲杜光庭隱處
以地考之古無祖師殿惟清都觀在白雲溪上則今之祖師殿
當卽古清都觀也再南爲

古儲福觀今廢按儲福觀在延慶觀南天倉山下福地記云天
倉諸峯神仙以爲帑庫往往有得異物者輿地紀勝云儲福觀
天倉諸峯屹然三十六天氣清明於天峯閣望之一一可數陸
游云儲福觀爲唐玉真公主修真之地今祖師殿軒轅項一帶
多有宮觀遺趾儲福當不外此特不可指名耳宋沈少南有詩

云割盡齊峯奉魯元更開沁水占名園何如帝子空山外落日
騎鹽芳草原胡叔豹詩云乘形如遺但養神阿兒爛醉梨園
春人百憾之耳不聞何物女子乃獨醒徑來空山卧白雲不見
漁陽胡馬塵陸游詩云路轉屏風疊雲藏帝子家窮幽行犧確
息倦倚樣杆綠薛封茶樹清霜折藥花世無勾漏令誰此養丹砂

天倉山又有

威儀觀今亦廢不可考宋文同有威儀觀詩云羣峯削瓊瑤老
大岷去簪笏儼相逐珠宮祕仙仗錦笈藏寶篋上帝此爲倉其田堪種玉在青城之麓者長生宮漢

之碧落觀也宋名長生觀一名范賢觀雲谷雜抄又謂范仙觀舊志云范寂字無爲又稱名友字子元漢昭烈時隱居修鍊於此得長生久視之道帝屢召不起封逍遙公後主易其宅爲觀壽一百三十餘晉李雄亂率千餘家依青城保險自守雄欲迎爲君固辭封天地太師西山侯蜀人多敬奉之唐味江山人唐

求有范賢觀詩云

數里綠山不厭難爲尋真訣問黃冠苔鋪翠
點仙橋滑松織香納古道寒晝傍緣溪鋤嫩

玉夜開紅竈撚新丹鐘聲已斷泉聲在風動搖花月滿壇宋陸游有長生觀觀月詩云碧天萬里月正中清夜珥節長生宮廣

塞勿墮人間世但怪步虛聲散瑤臺空四山沉沉萬籟寂天矯

鬢龍舞娛客珥紹老仙期不來獨倚闌干吹玉笛道人不怕九霄塞銀闕水壺處處看天台四萬八千丈明年照我扶藜看又

小憇長生觀飯已遂行詩云清絕長生觀再遊疑後身人問空石切物外自壺春道士青精飯先生烏角巾同頭增悵望倦馬

橫征塵國朝西漚李惺長生宮詩云隱隱琳宮隔石橋數聲清磬遠相招荷都貼水池新漲竹不篠風暑亦銷塵世勞人均

襪襪神仙好處但逍遙看某尚有機心在未若同傾酒一瓢在飛赴山下者有

飛赴寺

相傳在今王家林

卽寺僧之侵常道觀者方輿勝覽謂在青城

縣飛赴山下舊名昌聖院乃唐左軍客嚴遵美捨宅有四望亭神僧傳云青城山有異僧出入井中赴供長安頃刻復還廣明

中乃賜名飛赴寺按北夢瑣言稱遵美徒劍南王先主優待甚
奚於青城山下卜別墅以居則遵美之卜宅在王蜀時已屬廣
明後又按開元御勅云常道觀在青城山中聞有飛赴寺僧奪
以爲寺云云是開元時已有飛赴寺非遵美宅也明甚又按紀
元年表廣明始賜名飛赴耶二說均有未合蓋飛赴之名因山
而起遵美卜宅近寺後或捨入寺中抑或遵美好爲福田利益
廣有佈施爲時傳頌記者附會之而未及深求遂致兩有參錯
亦未可知耳宋文同有飛赴寺詩云平林露層嶺上獨置孤寺
羣仙馭飛駕往往赴於此

風光幡影亂日落鐘聲起
誰可謂詩豪興來吟苦紙

古蹟記

牡丹坪方輿勝覽云自青城之長坪山捫蘿而上由鳥道三十里許有平阜數十畝高樹蔽天春深先花後葉狀若芙蓉香類牡丹人號枯枝牡丹譙定李浩隱其中范成大詩千丈牡丹如錦蓋人間姚魏敢爭先是也

芙蓉坪吳船錄云大面山一上六十里有坪坦夷曰芙蓉坪道人於此種萼非留旬日不可登且涉入夷界雖羽衣輩亦罕到軒皇壇卽授道壇青城山記甯封棲真北巖之上黃帝築壇拜爲五岳丈人今訛爲軒皇臺

天峯閣在儲福觀河圖括地象謂觀爲玉真公主修真處有天

峯閣望三十六峯如列屏

讀書臺在白雲溪爲杜光庭讀書處陸放翁讀書臺詩自註云
光庭字賓聖括蒼人喜讀書工辭翰應百篇舉不中入天台山
爲道士僖宗召見賜紫充麟德殿文章應制後隱青城山白雲
溪自稱東瀛子蜀主王建賜號廣成先生有廣成集一卷壺中
集三卷詩云山中猶有讀書臺風掃晴嵐畫幃開
華月冰壺依舊在青蓮居士幾時來

赤城閣在長生宮輿地紀勝云長生觀後有赤城閣舊志云漢
昭烈時范寂隱居此閣手植栱樹猶存後主改爲碧落觀宋始
改長生觀也

謙巖在大面山宋史稱謙定愛大面山之勝棲遯其中蜀人指

曰謙嚴敬而不敢名也

玉華樓輿地紀勝云在丈人觀宋陸放翁有夜登青城山玉華

樓木蘭花慢詞一闋云

閑那鄆夢境歎綠鬢早霜侵奈華嶽燒
悟真詮祕絕幽深養就金芝九畹極成琪樹千林星壇夜學步
虛吟露冷透瑤簪對翠鳳披雲青鸞邇月宮闕蕭森琅函一封

奏罷自鈞天帝所有知音郤

過蓬壺嘯傲世間甲子騁騁

三師壇在六時巖下昔天師戒鬼後蜀人立壇以奉三師三師
者天師嗣師像師是也

黃帝祠在常道觀青城山記云在黃帝授經壇下隋時建觀有
張天師遺跡及明皇御書碑據此當卽今三皇殿

冲妙觀舊名老君觀政和間改今名有杜光庭重修記乃漢天

師化蜀日太上老君降靈之墟

廣福院在大面山左下臨皂江去郡十里寶爲勝概

羊馬臺在赤石城崖上天師與鬼誓形如羊馬故謂羊馬臺

天師池在上清宮東北麓中昔天師居石城崖上於此作池以飲鳥獸又有天師栗乃天師手植十七株

甯先生洞在龍宮山後石室中黃帝時先生居此洞黃帝詣而師之

軒轅臺在延慶觀後有石龕中有天尊像及移觀手詔碑并開

元帝王真金仙兩公主等像

龍宮在上清宮西南崖穴可容千人龍穴在常道觀東

摩雲虎嘯二亭在香積山靈巖寺寺門今寺西有摩雲亭殆卽
址歟

玉眞洞皇甫士安青城山記云前爲青城後爲大面其下東北
有太室玉眞高城朝紀九超三極開元靈元等洞上帝以五嶽
仙眾劉景迴等主之

金華宮在上皇觀不一里許唐金華玉眞兩公主建前蜀王衍
與母徐太后同遊避暑宮遺址在焉

天倉洞咸通中河東薛逢爲綿州刺史夢入洞府及出門有人
謂之曰此天倉洞也尋使人訪焉入洞十里許仙迹宛然隔溪
見山川居第然不敢渡而止

石天地在常道觀天形有十二角地形正方濶六七尺漢天師
置此與鬼爲誓

玉女洞在大字崖南龍居山北已廢數年前山崖雨裂石壁間
露此三字洞字惟水旁數點玉文字完好按山海經補注云素
女在青城天谷山今名玉女洞當卽指此

龍門洞在香積寺溪逕曲折巖磴幽深有巨石狀若門闥上書
龍門石三大字卽古龍門洞也放翁有龍門洞詩云

我來香積寺清晨厯

龍門孤峯擗蒼昊大壑裂厚坤古穴吹腥風峭壁挂瓜痕水浮
石楠花崖絡葛蒲根構策意未饜褰裳探其源絕景豈可名恨

我詩語煩須臾蒼雲合但恐自雨翻東走得平野萬里扶桑敵

石日月隋書青城山有石日月像玉匱經云第五大洞寶仙九

室之天有石日月像天師立青城治於其中者是也或謂在延
慶觀東北或謂在西北迄不敢定

遇仙巖在龍居岡濃翠迷天瀑布飛灑時異人往還覲而不覺
及擬議則不可見矣

虎圈在高臺山絕頂傳爲古仙人豢虎地尚有鐵索在崖竇中
金鞭崖在山陰十三峯半一洞約廣數尺中有物狀若金莖者
三二直一橫光彩射日晴霽望之一可數昔人謂天倉諸峯
神仙以爲庫藏異寶於中殆其然歟俗謂蜀齋慶符王所遺殊
謬

大朝陽洞在混元頂北山崇嶺峻地極幽深每旭日初昇滿山

紅紫氣象萬千黃廉訪雲鵠有宿朝陽洞曉望詩云

夜雨空山枕石眠起

來指眼盼遙天平林日射青如黛大野雲鋪白似綿妙境靜觀殊有味良遊重續又何年生機樂意人間滿肯羨蓬萊頂上仙

小朝陽洞與大朝陽洞相距數丈風景彷彿

誓鬼臺明一統志在丈人峯下輿地紀勝云丈人峯下舊有龍穴出水淹害禾稼天師立石臺於上鎮之開元中刺史楊勵乃刻一面爲元宗真容一面爲佛一面爲天師像試劍石在延慶觀北高澗皆數十丈一名三島石舊志云相傳青城多妖魅天師欲誅之甫運法轟雷爍電中忽大石當路天師揮劍一擲石遂中分南一片復裂爲二

漏米石在香積寺舊志云先朝有鷄骨禪師振興道場每於石

縫中漏米以供齋厨今石尚存而米不復漏

內江王府沙坪山內有殘碑已不可讀惟內江王府數字尚存殆獻逆之亂曾經避地山中歟

鬼界古碑王象之碑目云在鬼城山下昔天師驅鬼於絕域有鬼界古碑字畫磨滅不知年代今悉無存矣

天生橋在乾元山懸崖萬仞有片石插削壁間長可丈許前凌空際無所依倚惟名花異草披拂左右相傳爲仙人遊戲之地大字崖在高臺山北丈人山南崖壁刻青城山三字大可數尺故名按清字唐開元十八年始去其點此書猶有水旁殆隋唐

問人所書歟

范長生遺像在丈人觀舊志云宋孫太古畫壁侍中范長生舉手整貂蟬像有詩云浮世升沉何足計丹成碧落珥貂蟬宋文同有題孫知微畫詩云太古奇偉士精思獨於畫馳心入茫昧萬物赴揮灑當時一名重顧陸非爾亞卓哉青城筆妙絕冠天下寥寥九天仗一一若神寫吾恐千載後是終無繼者

六時水錄異記云青城山宗元觀南二里有峭崖面對觀中高五百餘丈其山崖上有授道壇昔甯真君與軒轅黃帝授道之所澗底石龕有元宗皇帝御真每曰六時有水從崖上出至今不絕時人游禮見焉仙經云第五洞天上有流泉懸樹一日三時灑落謂之潮泉舊志謂其水順陰陽爲消長不涸不溢故曰六時又云六時水三字河東邊敏修施天漢匀千齡晝持馬

守中立石俱八分今龜與御真及勾書皆無水尚如故

天池在上清宮殿南福地記云青城有甘露芝草天池輿地紀勝云高臺山上有天池晉立上清宮於上俗謂爲麻姑池誤矣龍池舊志云池有二一在仙人洞之前方圓丈許深數尺眾流競注不溢不涸一在香積寺殿前廣可盈丈澄清不滓終歲如常

鴛鴦井舊志云在上清宮殿北濶不盈丈深亦如之二池相距數尺其水互爲淺深

鹿飲泉輿地紀勝云在青城縣西青城山

龍居溪輿地紀勝云在成都山下眾谷之水皆注其中懸溜九

十尺下有龍洞按潛確類書云成都山爲青城案山今青城之案惟龍居山無成都山而其下溪水多滙得毋因溪之名并其山而龍居之遂失成都之名歟迄不敢定魚子水在青城山西北谷中流入岷江云中有魚羽翼能飛舊傳得餐者長生

三溪水在龍居溪下水激巨石穿坳爲潭龍族居之上有古天宮老君石像皆神仙遺跡

響水洞在禪師崖北洞中流水不息響若輕雷每夜闌更盡有若笙鏞簫鼓自洞而出

石筍在龍居岡之北高十餘丈旁有小者一高一低依附而立尖簇插空狀若巨筍

九株松在延慶觀范蜀公詩九松崢嶸委二大夫封

古銀杏舊志云在常道觀靈官殿側圍一丈六尺高十餘丈枝
間鍾乳倒垂狀如玉筍長短參差雅若圖畫中皇觀崖壁亦有
銀杏二株圍一丈二尺高十餘丈此枝四蔭蒼翠玲瓏
歧莖櫻在天師洞前少南大僅拱把高約數丈一本而中兩歧
相傳爲天師所植

大小將軍樹蓋丈人觀牡丹也高十丈者名大將軍五丈者名
小將軍蜀郡桑門公實悟光題錢舜舉折枝牡丹詩云

三月江南媚景

天姚黃魏紫鬥爭妍那知十
大將軍樹卻在青城古洞前

蜀志補錄稱青城山有一百八景風月佳時登儲福望之厯厯

可數今經數百年滄桑迭變有昔存而今廢者有跡在而名殊者表彰無人遂就淹耳茲並錄之以待後賢搜訪

彭祖峯 石鑑臺 龍牙峯 野雲溪 藏雲塢 齊雲榭

垂虹亭 指雲閣 觸石軒 卧雲菴 青溪 碧桃溪 芙

蓉溪 海棠溪 溪光亭 過溪橋 乳泉 滴珠泉 清風

洞 鑑湖 萍花洲 蓼嶼 碧霞洞 乳泉 滴珠泉 清風

水 紫霞洞 鑑橋 藥圃 紫薇洞 烛柯亭 灌稻泉 酣醺洞

綠篠橋 玉微亭 紅霞塢 烛柯亭 灌稻泉 酣醺洞

茅堂 紫陽洞 桃源 暗香亭 金華堂 舳齋 翠光亭

黃梅嶺 煎茶溪 芹浦 鶯鵡林 韋廬 野人澗 枯坪

寶蓮社 妙高峯 婆羅坪 木蘭岫 桂香亭 石室
白蘋洲 藻壑 望岷埢 豹谷 百花潭 鹿闕 瑞香塲
芝畦 瑞荷塘 蓼葭渚 黃浦 菱灣 芭蕉谷 直釣
亭 和芳隴 金棖莖 鑑雉洪 楠徑 芙蓉島 咸寒洞
董杭 棲真洞 望山坡 黃葵坡 凤簫樓 跨鳳亭
牛關 駄鶴峯 化成洞 望闕臺 凝碧溪 寶陀巖 玉
女潭 尊陂 藏春島 水仙澗 菖蒲岡 丹臺 浴丹池
曝藥臺 芳草渡 采薇汀 金絲隄 菖蒲谷 種茶嶺
桂子谷 九曲池 華海 紅梅島

古今圖書集成
卷一百一十五

卷一百一十五

續刊青城山記卷下

事實記上

隱逸

江山之美因人而傳彼黃帝之於崆峒留侯之於紫柏普賢之
於峩眉類皆若是矧洞天福地奇異繁多後世無聞不猶愧鳴
條負夏歟記事實

晉范長生舊志云范友字子元涪陵人隱居西山蜀人敬之號
曰長生晉惠時李雄攻成都百姓保險自守長生率千餘家依
青城山後仙去方輿勝覽云范寂字無爲劉先帝時栖青城山
修煉得長生久視之術徵之不起就封逍遙公後主易其宅爲
長生觀晉書李雄傳云范長生涪陵人率千餘家居青城徐興

說之以糧資李流流軍復振又以長生巖居穴處求道養志欲
迎爲君長生固辭永興元年雄僭稱王改元建興長生自西山
乘素輿詣成都雄迎於門執版延坐卽拜丞相尊曰范賢長生
勸雄稱尊號遂僭位改元大成加長生天地太師封西山侯復
其部曲不預軍征租稅一入其家蜀錄又稱八年四月卒以子
中貢爲丞相長生善天文有術數蜀民奉之如神云云足補晉
書之缺按李鼎祚周易集解註引蜀才顏之推謂卽長生升菴
引陳子昂西山蜀才之語謂蜀才長生爲兩人華陽國志云長
生名延久一名九重又名支字元壽年過百歲涪陵丹興人則
長生又非一名矣又升菴文志云成都金客坊有石筍武侯

掘之得篆書蠶叢啟國誓蜀碑有濁歟燭觸五字眾莫解范
賢云亥子歲記濁字主水災寅卯歲記歟字主饑饉巳午歲記
燭字主火災辰戌歲記觸字主兵災申酉歲記觸字主稼穡富
贍以年事推之其應如響蜀錄所謂有術數者不其然歟

范長生智謀士也當蜀漢時有天子不臣諸侯不友之概李
雄一流人耳律以春秋之義實晉賊也乃因徐輿一言遂資
以糧使得割據成都君子竊爲疑焉予謂晉之范長生漢之
張留侯也留侯椎秦博浪報韓未成復佐漢破之秦鼎移而
紫柏隱人謂漢用留侯不知實留侯用漢也觀昭烈生平愛
賢若渴蜀士歸心乃徵長生不起就封逍遙公後主復於其

居建赤城閣賢如武侯亦資以金容坊石記可見君臣父子間寵眷隆禮貌極長生雖未起而心已感之忽遭晉變漢祚竟移其心甯無隱憾歟知李雄之果悍足以假手圖晉資之使成其事庶漢仇可復而知已可報此固智士苦心難以告人者也不然昭烈與李氏相去霄壤不事昭烈安能密於李氏且始資以糧繼勸稱帝豈前倨而後恭耶蓋其隱微中有一不可測度者在也吾故曰晉之范長生漢之張留侯也若徒以高尙目之烏足知其智謀哉

李堯夫梓潼人李雄戲曰何名之背時耶堯夫厲色對曰甘作堯時夫不樂爲蜀相又題盆池詩向外絕無地其中別有天後

遊青城山不知所終

隋趙昱字重明與兄冕俱隱青城師事李珏隨煬聞其賢徵召不起督讓益州太守臧賤強起之至京師帝縻以上爵不就乞爲守帝從之拜嘉州太守時犍爲潭中蛟害人蜀人患之曾昱使人往青城渡江溺使者沒舟七百艘昱大怒率甲士千人州屬萬人夾岸鼓譟昱持刀沒水頃刻江盡赤石崩吼聲如雷昱左執蛟首右持刀奮波出州人戴爲神隨亂潛隱不知所終嘉陵漲溢水勢洶然蜀人思之俄見昱霧中騎白馬從數獵者於波面揚鞭而過水遂息太宗封神勇大將軍廟食灌口歲時民疾病禱之輒應上皇幸蜀加封赤城王又封顯應侯宋初封川

主清源妙

道眞君

龍城錄

唐孫思邈華原人天后朝居嵩山修道時大旱有勅選洛陽德行僧徒千百人於天宮寺講仁王經祈雨有二人在眾中鬚眉皓白講僧曇林遣人請罷後可過院既至問所來二老曰某伊洛二水龍也聞至言當改化林曰講經祈雨二聖知之乎曰安得不知然雨須天符乃能致居嘗何敢自施林曰奈何二老曰有修道人以章疏聞天因而滂沱某可力爲林乃啟則天發使嵩陽召孫思邈內殿飛章其夕天雨大降思邈亦不自明退詣講席語林曰吾修心五十年不爲天知何也因請問二老二老

曰非利濟生人豈得昇仙於是歸蜀青城山撰千金方三十卷
既成自曰冲舉

獨異記

符載字厚之蜀人有奇才始與楊衡宋濟棲青城山習業衡擢進士第濟老死無成惟符以王霸自許恥於常調韋南康鎮蜀辟度支使雖受知尚多偃蹇韋公於二十四化設醮請撰齋詞于時陪飲摩訶池符離席盥漱令使院小吏二人捧硯分兩題繞步池濱各授口占其敏速如此劉闢時爲倉曹參軍依舊棲章公特與撰真讚其詞云矯矯化初氣傑文雄靈螭出水秋鶚乘風行義則固輔仁乃通他年良覩麟閣之中洎京兆變故彭城知留務起雄據之意符爲其靡凡有代奏愈更恭順闢敗

幕僚多罹禍惟符以箋奏草稿一篋高崇文相公長揖東下棲於廬山前之真讚可謂有先見也

北夢瑣言

嚴遵美爲唐左軍容使閹宦中仁人也自言北司供奉官袴衫給事無秉簡入侍之儀又云樞密解舍三間屋書櫃而已亦無視事廳堂狀後貼黃指揮公事乃楊復恭奪宰相權也自是常思退休一旦發狂手足舞蹈家人咸訝旁有一貓一犬號謂大曰軍容改常也顛發也犬曰莫管他從他俄而舞定自驚自笑目異貓犬之言遇昭宗播遷鳳翔乃求致仕蜀軍收降興元健劍南依王先主優待甚異於青城山卜別墅居之年過八十而終其忠正謙約與西門季立爲季也時誅宦官惟西川不奉讞

由是脫禍家有北司治亂紀八卷備載閩宦忠佞好惡言

北夢瑣言

宋張愈史云其先河東人徙居鄆少雋偉有大志游學四方屢舉不第寶元初上書言邊事請使契丹令外夷相攻以完中國用使者薦除秘書省校書郎願授父遂隱青城山文彥博治蜀爲置白雲谿杜光庭故居處之名白雲先生丁內艱鹽酪不入口植所持杖於墓忽生枝葉六詔不起喜奕棋樂山水遇有興雖數千里輒盡室往遂浮沅湘觀浙江潮升羅浮入九疑買三載鶴以歸杜門著書未就卒晁氏稱其有西漢風蘇子美亦嘗以爲不能費著世族譜稱愈二子石民楚民登元豐進士第官至奉正大夫子吉甫以賞終朝議大夫子伯振以賞爲青城令

石民子雲從孫文叔夏曾孫山父又足補史傳之缺祀鄉賢祠
孫知微字太古彭山處士也知書能論語通黃老學善雜畫初
師沙門令宗俗姓邱氏所至必與相欵高談劇辨出人意表蜀
中寺觀多有親筆但畫釋老事迹則不如韋在於山野經時方
成寓居青城山白侯塲趙村愛其水竹深茂以助其興見聖朝
名畫錄又黃休復云知微形貌山野性介潔欲畫道釋尊像則
精心作意虛神靜思不茹葷飲酒愛白侯塲水竹幽深靄塵不
入冀絕外慮得專藝學畫思遲滯無羈束有位求之不動卽絕
食託疾而遁嘗與導江女巫問鬼神情狀以資其畫云

見茅亭客話孫

知微本儒者雖善雜畫與
藝士有別故列於隱逸

譙定字天授涪陵人少學佛析其理歸於儒學易於郭曩氏自見乃謂之象一語以入郭曩氏者聞程頤講道於洛乘其學而學焉遂聞精義造詣愈至歸後頤貶涪北山有巖師友游泳其中名曰講易洞靖康初呂好問薦之朝召爲崇正殿說書不就高宗卽位許翰又薦之詔詣行在至維揚寢甚一中貴憐而餵食不受與之衣與金亦委而去金兵至歸蜀愛青城大面之勝棲遯其中蜀人指曰譙巖敬而不敢名也稱曰夫子有繪像祀者久而不衰後不知所終樵夫牧童往往見之宋史載其事放翁亦稱其百三十餘歲巢居險絕人不能到數年輒一出蓋得道於山中者升菴謂其在牡丹坪放翁有託上官道人寄譙先

生五言一首云

寄謝謙夫子今年一出無萬緣隨夢斷百念與形枯雲護巢松谷神呵燬藥爐憑高應念我自

首學徵租又有寄懷絕句云丈人祠西山谷盤麻姑洞前松櫟寒仙翁欲覓渺無處聞在青溪沿大丹自注云仙翁謂謙先生

姚平仲字希晏世爲西陲大將幼孤從文古養爲子年十八單

臧底河斬獲甚眾夏人莫能支言撫使童貫召與語平仲不屈

抑其實關中豪傑皆推爲小太尉平睦州盜功冠軍仲不願賞

欲一見上益忌之他將皆召見平仲獨不與欽宗在東宮知其

名及卽位金人圍都城召對便殿厚賜之許以殊賞平仲請出

死士斫營擒虜帥以獻及出連破兩寨虜夜徙功不成遂乘青

驃亡命一晝夜馳七百五十里始食欲隱華山以爲淺至青城

山上清宮人莫識也復入大面山二百七十餘里度莫能至乃

解鯀得石穴以居建炎初下詔求之弗得也乾道淳熙間始出至丈人觀自言如此年八十餘紫髯鬚然長數尺面奔奔有光行不擇岸慄若奔馬作書奇偉秘不言得道之由放翁嘗爲生傳有寄題上清宮壁間五古一首題云姚將軍靖康初以戰敗亡命建炎中下詔求之不可得乃從呂洞賓劉高尚往來名山有見之者予感其事作詩寄題青城山上清宮壁間將軍償見之乎詩云造物因豪傑意將使有爲功名未足言或作出世資姚公勇冠軍百戰起西陲天方覆中原列非一本支脫身五十年世人識公誰但驚山澤間有此虎豹姿我亦志方外白頭未逢師年來幸廢放篠遂與世辭從公遊五嶽稽首餐靈芝金骨換綠髓歛然松杪飛又有託上官道人寄姚太尉五言一首云太尉關河傑飛騰亦遇時中原方蕩覆大計易差池素壁龍蛇字空山虎豹姿烟雲千萬疊求訪固難知

勾白符青城人受業丈人觀爲道士與張俞爲詩友自號岷山
逸老白符嘗自云左執范賢袂右拍薛昌肩舉頭傲白日長嘯
振青天囂者安知華夏之內有此逸樂乎不知岷山之逸老
於我乎抑我之逸老於岷山乎見輿地紀勝按楊升菴五隱贊
卽本白符自云者組織成文耳

古藏用輿地紀勝道士古藏用台州人咸平中隱居青城山飲
一石殊無醉態大中祥符中召見正歸青城御賜詩曰海霞照
物散青烟厯厯星榆在曉天松韻寒烟無世態鶴翔高頂應鳴

絃

張隨皇祐中居青城山注魏伯陽之書列數一圖於後

通考

馮山人名懷古字德淳遂甯人有人倫鑒善地理太平興國中
卜居青城山三溪路牛心山前看花山後立大閣三間假息其
中所論皆丹石之旨以吐納導引爲事丹經道書無不研考往
來雜遷大都求神仙製丹石耳傳者以方書爲要授者金帛爲
情咸平中成都豪家葬父選山卜穴數歲方得令馮視之曰陵
同阜轉山高隴長水山分明甚奇絕也主人曰葬後家財耗散
人口淪亡何奇絕如是山人曰萬物中人最靈受命於天與物
且異貴賤各有其位如鳥巢獸穴毋相奪者此乃公侯之地豈
常人可處亡者不安存者不甯易曰負且乘致寇至小人而乘
君子之器其是之謂乎

茅亭客話

安世通史稱青城山道人本西人父有謀策爲武官數以言于當路不用自沉於酒終世通隱青城山不出吳曦反獻書成都帥楊輔曰世通在山中聞變不覺大痛世通雖方外人而大人先生亦嘗發以入道之門竊謂公初得職檄卽當還書誦其家世激以忠義聚官屬軍民素服號痛散金發粟集忠義閣劍閣檄夔梓興仗義之師以順討逆誰不願從而士大夫皆酒缸飯囊不明大義尙云少屈以保生靈何其不知輕重如此夫君乃父也民乃子也豈有棄父而揀子之理此非曦一人之叛乃舉蜀士大夫之叛也聞古有叛民無叛官今曦叛而士大夫皆縮手以聽命是驅民而爲叛也且曦雖叛逆猶有所忌未敢建正

朔殺士大夫尚以虛文見招亦以公之予否卜民之從違也今
悠悠不決徒爲婦人女子之悲所謂停囚長智吾恐朝廷之失
望也凡舉大事者成敗死生當皆付之度外區區行年五十二
矣古人言可以生而生福也可以死而死亦福也決不忍汙面
戴天同爲叛民也輔有重名蜀士大夫勸以舉義世通言尤切
至輔不決東如江陵請吳獮舉兵討曦未幾曦敗獮使蜀薦士
以世通爲首云宋史隱逸傳

近藤車掌

名下事實記上

駕送
ナ
一
二
八

事實記下 方技

五帝甯封舊志云黃帝時人帝從之間龍螭飛行之道唐以來號五岳丈人儲福定命真君青城丈人觀卽修真處宋賜名會慶建福宮列仙傳云黃帝時爲陶正積火自燒隨烟上下視其灰燼猶有骨時人葬於甯北山中故謂之甯封子又青城山記甯封先生棲於北巖之上黃帝築壇拜爲五嶽丈人晉代置觀又錄異記云開元中元宗夢神仙羽衛集於宮中有朱衣金冠者下謁帝召司馬承禎訪之奏曰今名山嶽瀆之神以主祭祀太上慮妄有威福命上眞監蒞川嶽有青城丈人爲五嶽之長濬山九天司命主九天生籍皆爲五嶽上眞各置廟以齋食爲

饗

司馬季主楚人北游五六年西入蜀居青城老人村

見集仙傳漢馬

鳴生新志云臨淄人本姓和字君賢常遊青城山後入華陰仙去按神仙傳云少爲縣吏捕賊爲賊傷死遇神人救之遂活乃棄職隨神欲得金瘡方後知有長生術隨之負笈周游天下勤苦厯年受太陽神丹經歸入山含藥服之不樂昇天服半劑爲地仙所居不過三年輒易地人不知也

陰長生新野人漢皇后親屬不好榮貴惟務道術聞焉鳴生得度世之道求爲執奴僕之役鳴生不教之但日夕談世事農業十餘年長生不懈共事十二人皆去長生執禮彌肅鳴生曰子

眞能得道矣乃歸入青城山煮黃土爲金立壇西向授以太清
神丹經鳴生別長生歸丹成服半劑卽昇天作黃金十數萬觔
應天下貧乏周行天下一門壽而不老在民間三百餘年

神仙傳

李意舊志云漢文時人居青城山能前知蜀漢章武元年將伐
吳使陳震聘至問師吉凶不對索紙筆畫兵馬器械四十餘紙
以手裂碎又畫一大人臥路旁掘土埋之寫一白字稽首去後
悉應又唐元宗聞有仙術屢召不至復遣使召之但以一圖付
之使者上其圖乃畫一山山上一茅菴菴下一鹿時皆不解後
祿山亂幸蜀始悟其旨又神仙傳與蜀志均作意期神仙傳尤
詳

張道陵沛國人本太學生博通五經晚學長生之道得黃帝九鼎丹法家貧製藥不就聞蜀人純厚易化且多名山與弟子入蜀住鳴鵠山隋書青城縣有著道書二十四篇精思錄志忽天鳴鵠山青城山著道書二十四篇精思錄志忽天人下降千萬騎不可勝數授以正一明威之道陵受之能治病百姓翕然歸之戶至數萬設祭立條教使弟子輸出米物領人修復道路不修者使疾病百姓斬草除溷無所不爲又欲廉恥治人使有疾病者皆疏記生身之罪投水中與神盟約不得復犯於是百姓不敢重犯皆爲善陵合丹成服半劑不願昇天分形作數十人行氣服食故用仙法嘗云九鼎大要惟傳王長後合有人東來得之并言日月形狀果有趙昇至時東來皆如所

說陵七試乃授丹經陵與昇長皆白日昇舉

又枕中記云張道陵爲三天法師統

御六虛數侍金闕太上之股肱

李阿蜀人傳世見之不老常乞於成都市所得復散貧者夜去朝還莫知所止或往問事無所言但占顏色欣戚卽知吉凶若含笑則有大慶微歎則有深憂有古強者疑爲異常親事之隨阿還乃在青城山中其異不一而足強年十八見阿年五十許強八十餘阿猶不異後言崑崙山召當去遂不還

節錄神仙傳

王谷神皮元耀皆青城山道士通老莊妙於星緯周遊名山渡荆渚泛瀟湘至南嶽居金母殿後胎息道成東遊羣山訪九仙武帝南巡見之封王爲太微先生皮爲太素先生

蜀漢陳勲字孝舉蜀州人博學洽聞鄧艾伐蜀後主降勲入青城師谷元子宋徽宗政和二年封正特真人列仙通記

晉容成公譙秀蜀記載蜀之八仙首容成公云卽鬼容區隱於鴻濛今青城山也按葛洪枕中書云容成子力黑子爲岷山真人今元子五子爲岷山侯鬼谷先生爲太元師治青城山

李珏舊志云蜀人得黃房公丹道改名棲真號太虛詣武夷山潛脩歸經龍虎山時旱禱弗應先夕零壇有夢真人者次日珏至眾弗知也夢者指之羣請禱雨應時滂沛後至真州玉虛庵以道授張紫瓊囑曰丹宜潛修道宜授人尋歸青城重九上昇又一統志珏青城道士後仙去唐明皇封祐應寶慈先生

鷄骨禪師西魏時來青城唯嗜食雞將示寂滅所食雞自其口出飛鳴而去有一鷄墮地缺股師知侍者竊食叱令吐以此續之鷄復全體飛躍今有塔在香積寺號爲鷄骨禪師塔見輿地紀勝

唐玉真公主睿宗第八女也與金仙公主皆隸道入蜀居天倉山其後羽化葬於山側明皇幸蜀開冢視之僅存冠履今儲福觀有銅鑄明皇公主二像見輿地紀勝

馮大亮仙傳拾遺導江人家貧好道無所修習每方士過門必流連延接惟一牛拽磨自給一旦牛死其妻對江曰何以資口食乎慈母山道士每過家卽憇累日時道士復來夫婦以告道士曰皮角在乎卽取皮繚綴如牛形以繩縛口遂起曰此牛不

飲食慎勿解其口力倍於常數年盛暑牛喘甚牧童解其口遽成皮角然其家已漸富改置酒肆仍好賓客有樵叟常詣飲酒禮接之不言錢一日叟偕八人至袖中各出柟木一枝纔五六寸裁於庭便飲盡歡去曰此枝徑尺則家財百萬此時可貢天子垂名國史冊年後會於岷嶺巨人官當授以飛仙之道言訖去旬日樹已徑尺其家富甚元宗幸蜀大亮助錢三十萬以資國用輿地紀勝云馮大亮與八仙相遇隱慈母山舉家得仙八仙各種一柟信宿合抱按慈母山寶山圖經云滋茂萬物故名慈母有龍池洞穴

唐王仙柯蜀人住青城翠園山儀鳳中得道仙去蜀州僧中寤

遇於龍池山曰聞仙名已久胡爲在此柯曰吾昔有靈藥止能
飛步今全家隱於後山更修道法見詩話總龜又舊志稱王柯
字野山青城人母丁氏夢大星照身而生幼穎異長仁慈好施
遇至人授丹訣修煉無成鼎忽破丹化爲金復遇道士奉事三
年嘉其誠授以秘訣丹成服之儀鳳三年五月上昇

李笈濟南人寓臨安詣淨雲寺見青衣道人邀同食筭味甚美
道人忽不見笈覺身輕神逸行步如飛不復飲食後隱青城山
乘雲去廣輿記

羅公遠彭州九隴人嘗往來青城羅川閭開元中游鄂州因見
守江龍刺史欲試其術公遠請俟之及期龍果見江心刺史因

以聞元宗召見奏對稱旨嘗召與葉法善金剛二藏試法輒勝尤善隱形上欲傳其術答曰陛下玉書金簡已格九清豈可以四海之尊輕信小術若盡臣術必懷聖入民間困於魚腹上怒斬之有使自蜀還公遠謂曰吾晉成帝咸和間入蜀棲修聞天子好道而來以人間臟腑葷血充積三田未虛六氣未潔請以十年而授何遽殺我然得道之人豈世俗兵刃能害因出書令達上并贈蜀當歸明皇幸蜀公遠迎於劍門至成都拂衣去世傳於蜀九仙臺上昇彭溟人猶祀之舊志

病冷和尙初寓蒙山病冷且久遇老父教服雷鳴茶病瘥精健異常年八十餘入青城山不知所終

李浩字太素不知何許人隱青城山牡丹坪與仙人爾朱先生游作大遷丹詩百首行世或傳舉家仙去見全唐詩

譚峭字景昇國子司業譚洙之子好道術辭父遠游師嵩山道士避穀養氣後居南嶽煉丹成能隱化復入青城云

文獻通考

張君相岷山道士也精老子嘗集河上公嚴遵王弼何晏郭象鍾會孫登羊秋羅什盧裕劉仁會顧歡陶隱居松靈山人裴處忠杜弼集解張憑張嗣臧元靜小孟大孟竇弼宋文明諸稊劉進喜蔡子晃成元英車惠弼等註君相稱三十家而列其名止二十九家蓋君相自以爲一家合併數之耳君相不知何時人稱成元英爲皇朝道士則天天寶後人也以絕學無憂一句附

絕聖棄智未以唯之與呵別爲一章與諸本不同

文獻通考

薛昌幽薦人天寶間道士也棲青城洞天觀得商陸酒飲之耳鼻流血死經三日而蘇數日外洞見遠近雖山林崖巘不隔視聽元宗好道節度使延至賓館欲送京師忽失所在或見之大

面山

列仙通紀

灰袋蜀道士爲瞿天師晚年弟子素性狂翟每戒徒眾勿欺之謂此人吾不及嘗大雪中衣布衲入青城山暮投蘭若求宿僧曰貧僧一衲而已天寒如此恐不能相活道士言一床足矣夜半雪深風起僧慮其死就視之去床數尺氣蒸如爐流汗袒寢僧知異人未明不辭而去每住村落不逾信宿會病口瘡不食

數月狀將死人爲設道場齋散忽起謂眾曰試窺吾口中何物
乃張口如箕五臟悉露眾驚異作禮問之唯曰此足惡此足惡
後不知所終

西陽雜俎

劉無名成都人蜀先主後也幼好道入青城山北崖洞遇青城
真人授以丹訣還霧中山築臺修煉開成二年猶在嘗自述無
名傳後入青城山不知所終

列仙通紀

徐佐卿青城道士也天寶十三載重陽日上獵沙苑雲間有孤
鶴過翔親御弧矢中之鶴帶箭徐墜將及地歛然矯翰西逝良
久乃渡益州明月觀距郭十五里佐卿歲必數至或三五日或
旬朔言歸青城一日自外入曰吾行山中爲飛矢所加已無恙

矣然此箭非人間有留之以付箭主慎勿失乃題壁誌歲月而去時天寶十三載重陽日也及幸蜀偶遊觀中覩挂箭命侍臣取翫之蓋御箭也道士以實告上大奇之自是亦無復逢佐卿

者見集異記

神異錄

薛幽棲蒲州人開元中進士及第始弱冠調陵縣尉棄官去入青城峩眉間後遊南嶽得道列仙通紀

楊通幽名什伍能術數元宗幸蜀悼念貴妃或云什伍可致召至行在令行術奏云東海蓬萊頂有上元女太真者卽貴妃也謂聖上後一紀當見願重聖體毋復念取所賜金釵錫盒及玉龜子爲信什五以進賜名通幽問所受云臣師乃西域王青城

真人家居數載登後城山葺靜室於頂一旦與羣真俱去

仙傳拾遺太真

外傳載通幽事較詳

王老不知何代人天寶中有崔姓尉蜀卒連帥章仇兼瓊哀其妻少置別墅於青城山下又以美欲聘之與妻謀邀女客會成都欲便留尉妻也不意爲舅族盧生所納兼瓊怒促騎往拘盧談笑自若曰夫人不可不行當送數色衣來言訖乘驃去兵騎追不及俄小童捧箱至有故青裙白衣子綠幘子非人世有尉妻服之至成都諸女郎先期至兼瓊覩於帷下尉妻入光彩射目不可正視坐皆憚氣不覺起拜會訖歸三日卒兼瓊具狀奏聞元宗問張果果曰青城山王老知之元宗召訪之兼瓊命衙

官遍索不得惟草市有賣藥一人稱王老所使隨之入山數里一草堂皤然鬢髮隱几危坐衙官宣詔致意老曰此必多言小兒張果也因與到京元宗問之時果在側王老叱曰小子何不言又遠取吾來因奏曰盧二舅乃太元夫人庫子因假下遊以尉妻微有仙骨納爲媵因盜夫人衣服受罰甚重今爲薦單天子矣亡尉妻以服衣故墮入地獄奏訖乞放還不知所終元怪錄

王蜀杜光庭舊五代史云長安人應九經不第長安有潘尊師耆道術甚高僖宗所重光庭素遊其門僖宗幸蜀觀道門牢落思得名士主張之駕還詔潛尊師於兩街求其可者奏曰臣觀兩街之眾道聽途說一時之俊卽有之掌教之事恐未合應聖

旨臣於科場中識九經杜光庭其人性簡氣清量寬識遠困於
風塵思脫履名教久矣以臣思之非光庭不可僖宗召問一見
大悅遂令披戴賜紫衣號曰廣成先生即日馳驛遣之王建據
蜀待之愈厚號爲天師嘗以道德二經註者雖多皆未能演暢
其旨因註廣成儀八十卷已術稱是識者多之又蜀檮杌云光
庭字賓聖京兆杜陵人寓居處州方干稱爲宗廟中賓玉太主
與鄭雲叟應百篇舉不中入天台爲道士僖宗召見賜紫衣出
入禁中乞遊成都隱青城白雲溪王建以爲傳真天師崇真館
大學士續博物志又謂避亂入蜀稱廣德先生其說互有同異
要當以史爲正

孟蜀申天師十國春秋云唐元宗裔也修道青城山廣政末後主耽情苑囿進紅梔子種三粒其花六出而紅香氣襲人後主喜之令圖於扇詔賜米帛隨手散盡後竟不知所之所著有怡神論若干卷服氣論一卷

十國春秋

劉雲雲青城山道士也後屬文谷嘗詣中書舍人劉光祚適雲雲與道士昇官客沈默繼至光祚出桃核盈濶尺餘文采爛然蓋蟠桃實也言少時遊華嶽道士授之雲出一白石形類鷄卵有紋如畫乃二童持節引仙人眉目毛髮衣履冠幘皆具云得自麻姑洞石穴默亦出片石濶寸五分長二寸五分隱露蟠龍鱗爪皆備云得於巫峽山間

野人聞話

宋程君友遂州小溪縣村民年六十嘗與人傭織草屨自給性仁慈道遇禽獸皆避不驚見山人道士則以傭負所得奉之與之負擔遺以錢不顧而回開寶九年雲頂山遇一道士引一黑狗令與攜拄杖藥囊至青城隨之入一小徑初田疇荒梗漸見花木行數里夾道怪石細竹桃花飛泉鳴籟不斷有觀宇依山臨水松桂清寂薄霧輕烟披拂左右道士升廳君友致所上道士取丹一粒令吞日若飢渴可嚼柏葉實些些君友懇留事道士曰且歸別止一室精思妙道九月八日當迎爾方拜謝黑狗起吠因出回顧所遇已失詢之乃青城洞天觀路君友歸即如教至九月七日夜月皎風清君友如有所待達旦雲霞五

色君友躡空行祥風彩霧皆起妻孥涕泗追望極目而沒知州
李準通判張蔚以爲妖因其妻男遺吏民尋踪鄉里不堪其擾
眾焚香禱之忽君友在衙請見通判張署曰若果仙豈復還令
拘之將加責辱君友俯首默坐不飲食問何以免曰新主將立
何患不免俄太宗登極眾方悟太平興國元年三月復上昇音
樂香風不止州以事聞賜家人粟帛獄吏張漢珍睹之因棄家
游名山

茅亭客話

李四郎名琰字廷儀其先波斯人隨僖宗入蜀兄珣有詩名預
資貢琰溫雅有節行業鬻香藥善奕好攝養以爐鼎破家惟餘
道書藥囊嘗得爾朱先生與青城南六郎書論淮南三鍊秋石

法每焚香薰之有桃核孟紋彩燦然真蟠桃實也晚年未而服之雍熙初游青城於六時崖下得一石如鷹卵色黑溫潤時有同道玩之忽誤墮地碎爲數片中空焉可容一合許物四畔刻龍鸞雲草之形文理纖妙奇異殆非人工或謂神仙所玩之物云

茅亭客話

上官道人北人也居青城山巢居食松麪年九十人謁之但一笑耳有所請則託病暗放翁見於丈人觀忽自語曰爲國家太平與長生不死皆非常人所能然且當守國使不亂以待奇才之出衛生使不死以須異人之至不亂不死皆無異術惟勤而已放翁大喜從而叩之則已復言暗矣

老學菴筆記

皇甫坦夾江人善醫顯仁太后苦目疾不能療詔募醫臨安守
張岱以坦聞高宗召問何以治身坦曰心無爲則身安人主無
爲則天下治引至慈寧殿治太后目疾立愈帝喜厚賜之一無
所受令持香禱青城山還復召問長生久視之術坦曰先禁諸
欲勿令放逸丹經萬卷不如守一帝歎服見宋史新志云皇甫坦字履道居青城山

本列仙通紀

當以史爲正

皇甫士安青城山道士撰養生丹訣一卷 文獻通考

李壽儀蜀中道士邛州依政人精畫業師張素卿人呼爲李水
墨多畫道門尊像嘗往來青城山丈人觀益州名畫錄

寇子隆青城山道士也山有麻姑洞傳爲姑修真處子隆欲往

謁途中遇村婦曰姑今日不在取蘿蔔授之使食自是神清氣爽壽逾百歲孝宗隆興中羽化

列仙通紀

陳花子不知何許人居青城山嘗剪紙花於市賣以沽酒與陳搏往來山中多見之

列仙通紀

張中元河北霸州人人青城大面山中峯紫柏嶺結茅獨居

列仙通紀

通紀

趙公元天水人棲心於岷山之都察山二百三十年自稱年七百八十能驅使草木爲人療疾賴之者眾後入大面山不知所終

見輿地紀勝

元刑生青城山道士也精方藥武宗患心熱疾進藥罔瘳有言

道士者帝詔見以肘後綠囊中青丹兩粒繳梨汁進之疾尋愈賞賜萬金封廣濟先生經數日辭去後疾作再詔之青城山不知所終

太平廣記

明牟康民內江人少受異人傳隱居青城山萬曆末上書言辛酉九月蜀有變平者朱方伯變元俄奢酋據重慶亂賊將寇成都朱詣青城康民已候於途叩之曰酋至成都乎曰至矣十日耳圍城乎曰圍有五日可守乎曰不可然有公在無慮公二十二年鎮撫西南功比丘南康問天下事曰北都王氣盡矣後朱總督西南牟寄書云沐猴而冠與公作難熊據其險助之爲虐幸聖明在上無虞也已果爲劉宗祥劾大學士王應熊主之事等

得解通志

國朝疤和尚獻逆姪也賊敗潛身削髮隱邑之三十六峯面有
火藥燒痕號疤和尚問其名不答康熙間尚在嘗云獻初脫禍
無意殺人至湖廣望寧夜盜武當山金頂見神喝令快去非上
帝放汝收生定打殺汝以此自負爲奉天殺人

蜀碧

顧阿瑛玉堂山主人康熙間蔡太史時同友往山中謁之綠
鬢朱顏不食不飲談笑異常道元末明初事甚詳人謂已成地
仙先是蔡與漢陽太守王某善王年九十餘能御空行故引謁

焉

隨園詩話

龍泉和尚天台山人行腳來灌駐錫西山慶雲菴談禍福輒中

能召虎豹喜與鄉人飲謂結歡喜緣一日飲菴中將暮父老聞丈室中舐鴟聲問之娘笑曰欲見乎但無畏以塵揮之有二虎自室出目睽睽如巨星與座股栗娘此之逸去自是無敢赴飲者忽一日招諸父老作別又各道謝如遼行狀歸入丈室跏趺而逝余聞其名爲龍藏
未知果否卽龍泉

呂磨頭邑道士道光間人不知所自髮如亂絲疊一毬繫腰際時攜大木魚往來導江村市談禱福輒中有欲齋者食盡一席猶未足嘗趺坐伏龍寺數日不食自云與鐵瓢道士同躋大峩歷青城諸峯近遊此地攜鐵杖挂大鐵瓢重三十筋者是也後採藥青城不知所終

青城山拾遺

舊志云融照寺在天國山今廢明一統志云天國山在縣西有融照寺又云青城山紀青城有八大洞此乃第五洞按升菴集青城山一名天谷今作天國非又山海經西南黑水之間有廣都之野郭璞注云其城方三百里蓋天下之中素女所出也補注云其城郭璞別以異聞增入之也黑水廣都今之成都素女在青城天谷今名玉女洞是天谷卽青城非青城中別有一天谷也

神仙傳云張道陵入蜀居鳴鶴山著道書精思鍊志而不及鶴鳴山魏志則云道陵學道鶴鳴山而不及青城考道陵遺事青

卷三十一
事實記丁亥
城較多是鳴鵠之說爲不妄郡邑考又云灌縣梁改置齊基郡齊基縣隋改清城縣有鳴鵠山青城山是煦鵠當又青城之一支特不可指名耳

寰宇記云聖母山在青城縣西高二千丈周圍三十里南有深洞蘇惲聖母堂記猶存記云

嘉慶泉邑北直轄馳道俯僅一舍地聚落帶鎮市去市徑行越距半里拔秀

眾山環列崇阜遭迴巖嶺巒若百雉城岡峯岑繚匯崿竦天外綿亘固護高揭雲表由其峯半挺設平岡健盤壯垣方秩千步中構佛宮領僧刹迨百室有古褚氏聖母祠堂在焉諱按隋開皇中褚氏名相自江都來本唐安郡青城縣黑水溪人也黃冠草帶幼悟佛心葛帔練帑夙參法要先遊方外首卜此山端擇勝址芟蕘芒楨科樹括栢崖初地之位創安居之漸假息禪梵韜祕聲味勤事大雄氏教本爲空寂師表日遞月進精一無怠當時所聞見者亦未甚悉而奉之適值歲歉田稼民售飢餓則

持杖頭小端散粥而餉之救拯生眾眾給千萬活病充疲庶告
豐饒厥後以圓明相空俗身委化奉之者指其故地置祠塔以
歸其靈俗議習傳號曰米母院俄屬唐武皇會昌歲削廢天下
寺宇斯院與塔亦例除毀時革宜皇大中九歲白丞相敏中按
節右蜀首謀興建尋得法潤禪師主之仍謀遺基再歲能事揭
崇堂構殿廊廡牙闕宮室之備成與維新就刻舊塔石繪其遺
像遂設祠焉逮咸通中悟達國師知兀由長安來觀兩蜀名地
寓此僑隱亦繼住持因題爲聖母院其山亦從而名之唐室下
哀游經王孟兩世胙土僭朔此地靈異之應愈新於人救旱乘
時灼示爲霖之兆拯民布惠尤司及物之仁神變屢聞雖無曠
歲炎宋大中祥符二歲府主密直任公中正盼其顯迹拜章聞
上願賜名額未幾詔下院新瑞應之號至寶元慶歷皇祐之初
元閏時澤蜀土邁厲府主密直張公逸楊公曰嚴相國文公彥
博端明楊公察異諭將校就堂祭請置府佛廟設鐘梵焚獻以
祈之匪夕而應甘澍湊於百里之內農稼稔字蕃固秋成亨大
雨來拜祠下皆獲祥應著文賦詩大誌其異邇後動越兩蜀走
巴邛縵綿漢梓遂列郡縣鎮凡屬懲旱奔來千里請禱於前動
皆協懇章章然以願從人其神化之若是與夫包山奠宅庸列
聖姑之名崧岳升高亦著啟母之祀可並駕而議其明效祠前

舊刊李唐大中時朱道異譏記辭旨巽懦頗肆誣誕尤不可詳究觀其統載妝院時禪禱雨應祈之狀咸闕如也院僧維膺懼其故事湮廢因集其本末請序而申之貴乎聖母之遺烈斯院之所以興盡傳於時不泯余故執筆爲錄其實東竇山圖經謂滋茂萬物故名慈母有龍池池有金銀銅錢魚各從其色食者長生謂之肉芝此天皇眞人修道處也

蜀檮杌云廣政十二年召宴芳林園賞紅梔子花花乃青城山

進子種成紅香如梅放翁有紅梔子花賦云

余讀五嶽之書始

已之仲冬天界以此行極山中之奇觀乃稅駕乎雲局酌瀑泉之甘寒味芝朮之芳馨潤肺肝之塵土凜毛骨其淒清乃步空翠之間而聽風松之聲想一帝子衿佩青青手持異花六出其英以爲簷葛則色丹蓋苟得而强名方就視而慨歎已絕馳而莫及忽矯首而清嘯猶與袂而長揖援修蔓而上騰壁層壁而入敬變滅於轉盼久恍恍而伫立有老道士笑而語予人皆以爲得道求諸已而有餘顧舍是而外慕宜見欲乎狃狃嗟予好學而昧道有書而無師雖麤遠於聲利實未免吾甚奇請書先生之言用爲終身之規

雲谷雜抄云范仙觀裏芝樹高丈餘不甚增長花小而白每歲開花次年結子又次年方熟子如楮實文若龜皆味甘酸可食寶園山青城縣北三十里岷山之東洞在其下以其靈芝產玉神草繁金故以爲名

青城山卽長生觀山見輿地紀勝

天池山在岷山亦名泉峯山山上有池下臨絕壁人跡曾絕青城逸事

張素卿簡州人嘗客於夏侯孜多見名畫後落拓爲道士居青城山常道觀王蜀先主修丈人觀請畫五嶽四瀆十二溪女及嶽瀆曹吏詭怪生於筆端觀者恐懼蜀主誕日太傅安思謙進

所畫十二仙真形十二幀蜀主欣賞因命學士歐陽炯次第爲
之讚待詔黃居寘題以八分凡醮奏於玉局觀開懸供養見益州名

畫錄

杜覩龜益州名畫錄云其先本秦人避安史亂遂居蜀工雜畫
尤妙於佛像羅漢嘗爲蜀後主畫王子晉及唐諸帝像於上清
宮授翰林學士賜紫金魚袋十國春秋云丹青之妙出人意表
始師常粲寫貌野人繪像者推以爲首

東坡志林云章簪字隱之本閩人遷於成都數世矣善屬文不
仕晚用太守王素薦賜沖退處士一日夢人寄書召之云東岳
道士書也明日與李士林遊青城濯足水中簪謂士林曰腳踏

西溪流去水林答曰手持東岳寄來書警大驚不知所自士林
蓬州人語默不常或以爲得道者年逾百歲嘗見予成都曰子
已貴當策舉首已而果然

夷堅丙志云青城二月望爲道會巨室張氏唐氏輪主之旣集
閉門罷會乃啟一日有道士叩門闔者止之乃下茶肆脫笠挂
壁間曰爲我視此旋當復來少頃笠旋如輪驚報觀中揭之下
有詩云偶隨青帝下蓬萊劍戟崢嶸遍九垓綠履黃冠俱不識
高留一笠不沈埋

舊志蜀有道士嘗詣紫極宮謁杜光庭朝夕惟唱感庭秋詞一
夕列筵二青衣童侍立光庭欵戶乃令二童收拾筵具摺疊之

隨手而小將二童合爲一處可寸許納冠中啟戶已不見矣茅亭客話云劉長官名蟾美丰姿善談論涉獵史傳好言神仙事無子息夫妻俱五六十於偽蜀攝成州主簿聖朝克復匿川界貨藥改名抱一開寶中於鬼城山上結茅三間植果種蔬作終焉計時入青城縣貨藥市米麵鹽酪歸山人稍知之或云有黃白法一日有三人冒夜投宿自搆酒果就語及爐火事頗契合夜央語笑方酣客曰知長官有黃白法可梗概言之長官堅拒客復祈之不已長官曰某數年浪迹從師祇得此法豈輕道耶客曰某等願於隱齋効爨薪鼓鞴之役可乎長官辭以師授有時他日於丈人真君前相傳爾客作色云今夜須傳勿爲等

閒長官曰適慕君子同道何相逼如此客攘臂瞋目眄之良久
曰某等非君子是賊也如不得必加害腰間探出短刃長官與
妾惶懼憚其迫脅併法兼奉之殘藥三人得之揖拱而去長官
夫妻昧爽下山不復再往

茅亭客話云淳化癸巳歲冬十月青城山民往趙公山採薪遇
數苗薯藥頗大於常村人度其下必有大薯藥遂與妻子同掘
之深三尺餘但見根鬚抱一大瓮遂揭視之有大赤蛇如爛
錦盤結合內村人悸慄以鋤觸之蛇乃翻然化一雉飛入溪水
中含內餘一石簪村人持歸山舍其夜一室如晝村人轉懼此
物異常送與莊主明年值順逆作亂遂不知此簪所存

譙秀蜀記載蜀之八仙首容成公云卽鬼谷隱於鴻濛今青城山也次李耳生於蜀今之青羊宮三曰董仲舒亦青城山隱士非三策之仲舒也四曰張道陵今大邑鶴鳴觀五曰嚴君平肆在成都六曰李八百龍門洞在新都七曰范長生在青城八曰爾朱先生在雅州

附錄明焦維章遊青城山記

成都之西名山水而縣者以十數而灌爲勝灌之山以百數而青城尤勝時嘉靖二載季春三月予友馮子廷器諗於眾曰青城之秀甲於益州天倉諸峯左右森羅削壁崕巖望之蔚然其翠欲滴予因於其下故能詳也諸君其弗靳於遊乎予將披石

穿雲候君於青霄白石間亦勝事也予乃偕諸友剗舟渡江行
平沙中極目百里漸進山下一時林壑之美已覺勝絕取道馬
橋掠牛心山出橫山之下有小溪環崖而東可用灌漑以岸善
崩水輒泄前令績溪胡公使鑿之因崖爲岸民到於今便焉循
良之利民如是爲之喫羨過橫山折而西至石佛灣田皆膏腴
水四時不竭又折而西登小坂土地坦衍林谷迤邐望青城山
長生觀等處尚在翠微烟靄間諸路人始得逕北走里許有
二衲持辦香道傍迎之乃羅家菴也菴之所在中深外曲路入
幽溪怪石杈牙蹄股相合不可步跳躍而逕始達少焉陰雨冥
濛作瀟瀟聲矣急發南行一里餘雨亦霽比午後憩長生觀觀

久廢頽垣敗礎與灌莽爲伍物之興廢蓋有常數讀東坡橫山
之記不足慨也由長生宮西北行入山口山皆排闥擁澗夾路
蘚籜蒼鬱凡數轉抵建福宮宮亦荒虛不治其前諸山蒙茸宮
堯望可干仞惟貧僧數人茗漿不具已而吾友周子良翰自大
樂而至且攜酒及肴以進時已暝不可前矣迨晚風雨大作諸
子且飲且悵以爲天師洞陡絕荔蘂林深泥滑攀躋尤難其將
止此乎吾友鮮于申宗等宣言曰不可止也且宿一宵著屐再
登我輩毋首鼠兩端以貽靈運之愧厥明飯畢出宮日光蒼涼
掩映雲際周遭巨壑間丹壁峻嶒劃然大嘯頽首人在空谷中
酬和者西行崇嶺蘿磴如立仰首俯膺而上氣息僅屬遠望有

梨花一株燦如素錦卽洞所在也復過上數重道甚湫隘纔可
尺許旁皆邃谷易於墜陷凡行四五里得至洞下洞在石壁十
餘丈上與逕迴殊前令胡公懸爲棧道沿入洞中中塑道陵像
左塑明皇像或云僞主孟昶也山之奇峯清淑不可殫述右三
十六峯次第呈露黛色如螺其試劍石等山遠近朝拱若服於
洞之中山而岌然無阿附意浮嵐往來在我襟袖以及萬類攬
不盈掌天下之奇觀備矣然丹竈徒存白鶴不返所謂雲路咫
尺不可以登者與洞有菴一所比邱者年可近百不御酒肉且
云牡丹坪朝陽洞去此不遠乃各酌數杯下兩腋清風殊覺有
盪蕩之勢尋建福宮故道而歸會馮子廷器延飲其家諸友亦

醉飽連日爽氣方騰塵襟又塞矣昔太史公登龍門探禹穴而後爲文疎宕有奇氣朱張二儒遠臨衡嶽與道大適其時高邁之懷豈潦倒囂譁者所能與哉江湖余樂也此余青城之游不可以無言也

國朝邑令王夢庚有重脩天師洞常道觀記

常道觀者灌邑青城山第一峯之真常道觀也道書稱卅六洞天青城次於五嶽高三千六百丈屹然三十六峯羅列一百八景曰寶仙九室之天軒轅時真人甯封棲止焉黃帝從問龍蹻飛行之道封爲五岳丈人儲福定命眞君其言雖夸其事非盡無稽也後漢涪陵處士范叔字無爲昭烈帝徵之不起封爲通

遙公得長生術因稱范長生晉元康中蜀亂率數千人保險居
是山厥功偉焉廟爲碧落觀亦稱常道觀開元十二年元宗手
勅云蜀州青城先有常道觀所置元在青城山聞有僧奪以爲
寺勿令相侵觀還道家寺依山外舊所使道佛各有區分唐祖
元元皇帝宜崇奉如是遐哉茂以加矣張道陵亦脩真於是傍
有誓石青崖中斷龍穴乃不敢出水害稼下有白雲溪唐末杜
光庭隱居於是著道藏極爲繁富尤爲道家所宗述其他不可
深紀是誠羣真稅駕之奧壤幽人寄跡之靈區也顧陵谷變遷
壇宇頽廢有不湮沒於荒烟蔓草蓋幾希矣余以去秋權灌築
今夏偕友人一尋其勝求陸劍南所謂儲福丈人長生延慶等

觀題識皆渺不可得上清宮僅存小室二楹卑隘殊甚惟常道觀則唐勅古石歸然獨存古殿廊廡高下具備是殆鬼神呵獲之靈存十一於千百爲名山福地特綿其盛者歟惟土木之工多厯年所漸就夥渺道人萬本固銖積寸累募化十方踵而新之請一言以爲記余惟青城爲名山洞天之勝常道觀爲青城諸道觀之勝唐勅叮嚙誥誠如彼其後不爲補苴完善而聽其荒沒如名蹟何本圓此舉殊可與也因從其請而爲之記

逸事補遺

青城大面山乘和尚精禪學僧問如何是相輪峯師曰直箒烟
嵐際曰向上事如何師曰入地三尺五間如何是佛法大意師
曰興義門前鼈鼈鼓曰學人不會師曰朝打三千暮打八百佛祖

通紀

